

四
明
清
詩
略
續
稿

馮
軒



四
明
清
詩
略

續
稿

朱
孝
臧

用中華書局影印本
上章嘉祥文獻冬十一月

四明清詩略續稿卷一

董

沛

字覺軒號孟如鄞人岵子光緒丁丑進士官江西北建昌知縣著有六一山房詩集

董縉祺撰行狀略府君具異稟七歲能詩稍長學古文徧讀家藏書並借觀他氏及杭州文瀾閣所藏學極淹貫同治中修鄞縣志徐柳泉舍人引與共事舍人歿府君總之書出咸稱碑治通籍後服官江右充江西通志詳定官歷權劇邑所至修舉廢墜甄陶士類表章前哲有古循吏風補建昌值水旱之災爲民請命不憚忤上官之意撫軍潘公特嘉之其薦疏有云勤敏精能盡心民事歷任各縣判決如流興復水利隄工士民愛戴皆紀實也旋引疾歸里當道延主辨志崇實兩書院講求實學士論翕然宗之尤留意鄉先輩著作全謝山先生七校水經注原本爲有力者竊據乃摻求底稿校勘付梓督學潘公續輯兩浙輶軒錄甯波一郡屬府君主政因有四明詩略之輯生平著述甚富己刻者明州繫年錄七卷兩浙令長攷三卷甲丁鄉試同年錄三卷吳平贅言八卷汝東判語六卷南屏贅語八卷晦闇齋筆語六卷甬上宋元詩略十六卷六一山房詩集十卷續集十卷正誼堂文集二十四卷其餘詒經權史紀事之書多手稿未整比大半散佚可惜也

忻江明曰先生至性人也事母卽婉愉色養歿後遇忌日輒悲涕不勝處兄弟推甘讓善友愛甚摯撫從子不異所生尤愛士獎借後進如恐不及江明謬蒙知愛自爲館甥親授經史及古文法江明稍有知識皆先生教也先生文

以柳州爲幹參以廬陵集凡二十四卷身後江明與門下諸君校刊之當時以籌措刻資未能盡汰應酬之作至其精詣處實足與湛園望溪抗行詩則根柢三唐浸淫漢魏感時詠史諸作尤爲雋上蓋先生淵源家學汎覽四部六一山房藏書五萬卷寢饋其中於史學爲專長故發爲文章詳贍疏達宏深博雅卓然足以成家而爲吏極廉歸自江右所餘宦橐悉置主田身後家無餘資嗣子運水茂才蚤卒少子亦楣亦殤無人能讀父書江明飢驅奔走未暇理董遺書手稿散失殆盡錄先生詩不能無西州之痛云

偶作

積氣爲天高高無門下視萬寓蟣蝨緣禪杯水堂坳羣蟻洪潦
謂有報施神道設教
政令無常旱澇斯變嗟哉愚民爲吏受譴闖獻大劫天降殺星
流血赭野雷霆不驚
緯書談天崇奉五帝佛家卑之諸天旁侍西人曰噫天主獨尊
一倚一伏斯理互根

雜擬漢人詩

帶甲滿地蹙蹙靡之抒憤成歌以代慟哭篇首皆漢人句也

城上烏尾畢逋城下官化爲胡氈冠革履從番奴出自北門行
且趨北門之北長江流千年不洗逃官羞

二

是耶非耶睨而視之昔爲使君今爲養馬兒老婦嘻嘻兒弗悲
寢我牀衣我衣寇入我室爲言兒病危使君無恙他日當相依

三

戰城南墮城西城頭百尺高下有積尸恨不作灰與土縣官墮
城折右股求死不死淚如雨

四

侯非侯王非王鼓淵淵旂央央小民羅拜獻酒漿舒舒雁雞
豚羊號曰進貢齎盜糧謹諏舉國紛如狂

五

紅塵蔽天地大寇踞州衙紛紛下符印區畫鄉民家萬家置一
軍百家置一卒假彼周官名太平豈無術開局東南西大小相
繫維大局鄉官尊小局鄉官卑鄉官媚千歲搜括無餘資再拜
陳州衙勿顧鄉里私

六

高田種小麥低田種水稻粒粒盤中餐農夫自求飽一畝索千
錢徵糧太苛擾鄉民鬻妻兒鄉官書上考

七

一尺布一縷絲摺疊黃竹箱辛苦紅女機寇入我門無子遺無
子遺且弗悲鄰家有女作賊妻朝朝爲賊縫戰衣

八

舉秀才舉孝廉昂首日月中爾顏胡不慚紛紛求賊官揚揚趨

州城求之既得鄉里榮奴視戚鄰民父兄求之不得受賊刑匍匐杖下逃殘生泥首猶作哀猿鳴

九

涼風起兮天隕霜悲莫悲兮母終堂朝夕奠兮丹巾而紅裳鄉官之制兮無私喪

十

練時日謝南闕維家王之恩爾俸爾秩賊稱爲主曰家王以兄弟序也二月初吉日惟上丁釋奠先師蹒蹒孔廷言受厥胙言飲厥福謂溪水之清兮而河水之濁

十一

煢煢白兔韓盧逐之青青子衿萑苻辱之拜手稽首蟣蝨小臣頌明大王乃武乃文巍巍高門有車有馬宴樂嘉賓酌以大罍維鷹斯爪維虎斯牙謂爾無名爾名孔嘉

十二

山樹高斲爲梁互崇祠儷明堂袞冕衣金玉裝炳燎燭薦膏薌
禱福祉宜吉祥神哉沛靈之長兮黃戰土木殃烏啄屋鼠穴牆
裂帷幔災桷杙攫首臂搜肝腸佛清淨鬼跳踉陰冥冥天茫茫

十三

薤上露何易晞原上骨何纍纍故鬼哭新鬼啼擄人以爲兵兵

出不得歸今日調諸暨明日調天台

時二縣俱起義兵

十四

相逢狹路閒黃巾聯袂行謂妾好顏色取酒還共傾火伴六七
輩牽妾登高樓妾年十二三罔顧顏面羞前者旣相于後者迭
相和怯怯含苞花經風自摧挫黃巾樂復樂賤妾死溝壑棄尸
狹路閒日暮啄烏雀

十五

悲歌可以當泣冥想可以當書寥哉天地鬱乎獨居飢無粟寒
無襦嘻吁噉臣朔讀萬卷不如侏儒

出門

梧桐一葉落古樹皆成秋出門百日期如懷千歲憂理我安道
琴添我平仲裘檢視囊篋中催僕登行舟寒蛩織籬落獨雁悽
汀洲顧此百端集黯黯生離愁

再拜辭高堂高堂病在牀低言囑諸弟湯藥須親嘗有妹年及
笄未嫁依母旁聲聲問阿兄何時歸故鄉去時叢桂開葉底凝
秋霜來時嶺上梅料有南枝香

是科秋試
改期九月

宿昔談詩書意不慕榮利祇緣親在堂乃作祿養計風雲無定
期莘渭有遭際抗懷古賢人時來不可避而我風塵中碌碌困
征騎翹首天門高初願渺難慰

徐柳泉舍人延余校宋元四明志卽事有贈兼示陳子相

明府勸

百家地理書厥祖始夷堅郡國有計簿乃在班史前吾鄉建州號肇自唐開元有宋大觀初圖經始成編作者迭相繼文藻輝山川到今七百載棗本無一傳傳鈔付寫官謬種相流沿壺矢并爲樂益稷分爲篇曹部無正聲誰識宮與軒豈曰有宋存殷禮吾能言

吾愛徐孺子萬卷羅高閣連年兵火中猶尋讀書樂眷我桑梓鄉文史正穿落旁搜百氏言精究六藝略連綴改定之一手自刪削述者之謂明其功乃踰作

南里不失真東沙已殊轍下逮聞曹書涇渭更無別徒侈新義陳罔顧舊文軼閒或稗販之古人意愈失豈真蘭臺經行賄改以漆三豕或渡河誰識己亥日惟君發舊藏論古有真訣博收天祿書一一證吾說因博以致精河閒事求實幸此六帙存金

甌已無缺

校書如揀金披沙每見寶一覽謂了然何由測微妙於時陳太
邱衣著遂初早郵筒日往還相與證幽討此君故善疑因疑乃
生巧每於一綫中時闢康莊道文懿能補戈荆公戒撲棗空山
有落葉時時爲君掃不見通鑑成兩屋滿堆藁

賤子少食貧託鉢走四方著書杳無期辜負日月長惟君知我
心招我登君堂寸寸襪綫才奚補天孫裳望洋起長歎目眩金
碧光敢以蠡測深與海較斗量咸淳志臨安景定志建康未若
吾鄉書彙入 天府藏行當十匹酬羅列几與箱傳鈔八千紙
紙價貴洛陽

題盧孺人秋燈課詩圖

孺人黃巖人王毀夫
孝廉彥威之母也

涼颼起天末露下明河低高樓一星火諷誦三百詩王家阿母
賢能作閨中師有兒露頭角隅坐親教之證以毛鄭詁參以騷

選辭兒也夙穎悟聽之亦解頤吁嗟歲在丑乃遘風木悲無母
竟何恃悽惻披靈帷念我讀書樂逝者不可追呼工寫爲圖如
對親在時母本范陽望生具明慧姿割肉起父病篤行人所希
昔日事父孝今日爲母慈慈亦母恆德而復嚴課稽一編焦尾
稿孺人遺詩口澤杯棬遺珍重此篇什行當付棗梨長空獨雁叫荒
圃寒蜚啼揮淚題此圖我亦無母兒

題湯貞愍

貼汾

畫像

金陵王氣收地道火雷震將軍雖寄公

貞愍常州人

一死亦臣分狂

寇自西來千里無堅陣大帥昏不知獻策且遭擯

貞愍上攻守十二策總督

陸建瀛

義旅空結屯疲卒半投刃眼看孤城危誓願以身殉茫

茫獅窟中

貞愍別墅在金陵城北
曰獅子窟亦作詩之窟

圖籍共灰燼闔門投魚池清

流當埋殯憶在承平時儒將寓名郡南朝好江山風雅寫遺韻
節彼龍門開從遊得才俊誰稱都講生高第有文進死別踰十

年無由哭靈櫬敬爇一瓣香追摹舊鬚鬢

像爲門下士戴君雲所追摹

畫筆

師所傳神注貌相印能起觀者心瞻仰斗山峻將軍年古稀海

內播聲聞三世皆國殤

祖父殉節臺灣

風雨泣殘燐自有真氣存丹赤

在方寸上受 天子褒泉下復奚恨昔讀將軍詩煙水蘸餘潤

詩集已刊行

今觀將軍像身死氣猶奮再拜書贊辭用以表忠蓋同

此沈淵悲大招續天問

博陽山

出郭經博陽云是敷淺原其山甚卑小始見商周前高平與廣
平釋地非釋山或指匡廬峯於義殊不然古志稱博陽敷傳音
近旃訛寫乃成博謬種相流傳積久弗可改誰能辨烏焉博亦
寬廣意何必求高巔夏史文簡質兩字括真詮我以目驗之笑
彼諸傳箋斯地實敷淺脈絡交蜿蜒望文可生訓索解無多言
萬事貴親歷證我心所安徒區漢宋界猶覺持論偏

題潘嶧琴學使

衍桐

緝雅堂校詩圖

若昔儀徵相編錄輶軒詩猥以兩浙名致受瞿君譏

唐宋兩浙兼有蘇常

潤卽今制鹽政亦兼蘇松故瞿木夫譏其稱名之誤

要之采風職於古有專司煌煌五十

卷不愧風雅師曠隔百餘年公來一繼之條例仍舊貫轍迹相
追隨馳書徧屬郡寬以周歲期命彼選事者盍各舉所知紛紛
送都會某某咸在斯譬諸深山璞難免醢中疵惟公總厥成手
挈騷壇旗虛衷握明鏡屢照神不疲豈惟當代英珊網搜無遺
實令長逝魂亦感知己私幽光發潛德名姓如列眉英靈儻不
泯泉下應涕洟走也預分纂努力供指麾扁舟遠道來掘我登
堂衣披覽校詩圖羣彥爭留題聊復綴片言敬贊游夏辭

平陵東

有序

古樂府有平陵東一篇哀瞿太守作也余謂西漢之季
幾人稱帝幾人稱王若不以成敗論則統莫正於數月

之孺子而佐孺子以起兵者平陵人方望也哀其事諒
其心卽樂府舊題作詩以表之

平陵東太守門人哀義公平陵東我弔方望之孤忠方望平陵
人西州尊爲賓長安不能召天水不能臣漸臺傳首新莽死平
林下江擁更始更始劉宗非故君王郎公孫何論矣帝在定安
二十年孺子其王吾事旃臨涇草草謀興復隻手關中成一局
豈不知蕭王奄起大河北天命真人眷有德豈不知南陽濟濟
附鱗翼四七星垣拱辰極故君尙在一綫存草莽微臣敢惜力
臣不惜力臣心癡天之所廢不可支丞相李松作封豕君臣駢
首死東市望雖死望不負孺子望不負孺子望不負高帝如何
平陵東不哀方望哀翟義

梁湖大水歌

梁湖六月多水災我獨胡爲從軍來罡風陣陣挾龍氣雷鞭一

擲山門開連旬急雨萬矢疾貫入危牆勁如鐵溪流下注河流
高巨浪排空滾飛雪樓廬出沒波濤中城門如橋篙楫通曹娥
決口不復合大江故道西混東居民畏死向舟伏巨舟傾側小
舟覆朽棺亂竄入人家鬼亦無鄉可受哭鷗鷺上樹爭鵲窠樹
頭繫纜漁船多漁船有魚不得買我亦無米愁柰何錢唐破陣
載歌舞樓畝餘糧賸荒土奉檄追租不得遲老農低頭淚如雨
西來寇盜蟠三吳湖巖接境形勢孤如何腴田化澤國大兵竟
與凶年俱高高者天亦難恃忍使吾民作流徙我生之後逢百
憂重以追呼酷刑死中達中澤啼哀鴻宰官但說倉儲空平生
不識救荒策令我太息富韓公噫吁嚱令我太息富韓公
放歌行

一日一醉身飛空鶉衣爲鶴車爲龍天門誅蕩兩蛟倚以額叩
之帝爲啓羣仙袞袞趨早朝排衣玉節金步搖蓬萊產芝三萬

本我落其實青不凋

東家桃花李花白西家女兒好顏色李花落盡桃花飛女兒嫁
作屠沽妻人生萬事有真宰幾見桑田變滄海巍巍太行移過
河十年眼底愚公多

我有寶劍光熊熊偶然飛落江湖中黃冠道士誦神咒明年當
化雙白龍一笑歸來坐高閣寒漏孤燈鬼聲惡開門仰視月在
天風露淒涼袷衣薄

銀河沈沈夜將旦西有長庚獨星爛此星動搖占主兵諸軍帶
甲關西征男兒開口談經濟鄉里小兒聽之睡驚馬不上燕昭
臺金印斗大誰將才

黃門繼起建安霸豈料虛空謫仙下杜陵布衣稱兩雄後有作
者無此公隻手捫天取箕斗萬蟻聲中猛虎吼棒頭一喝禪家
機會我詩意微乎微